

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 447703 23 St
Datum: 15.11.2023. godine

Općinski sud u Tuzli, stečajni sudija Vedran Milašinović, u stečajnom postupku nad imovinom dužnika „HALIDović“ d.o.o. za proizvodnju, usluge i promet Gračanica, Pribava bb, dana 15.11.2023. godine, donio je sljedeće

RJEŠENJE

- I OTVARA SE stečajni postupak nad imovinom dužnika „HALIDović“ d.o.o. za proizvodnju, usluge i promet Gračanica, Pribava bb, matični br. subjekta; 1-6792, JIB; 4209169400009, broj žiro računa 1543802006297098 kod Intesa Sanpaolo banka BiH d.d. Sarajevo.
- II Stečajni postupak se otvara sa danom 15.11.2023. godine u 11,00 sati, kada se rješenje o otvaranju stečajnog postupka ističe na Oglasnoj tabli suda.
Oglas o otvaranju stečajnog postupka objavit će se u „Službenim novinama F BiH“.
- III Za stečajnog upravnika imenuje se Maja Musemić iz Tuzle, ul. Maršala Tita 60.
- IV Pozivaju se povjerioci da u roku od 30 dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečajnom postupku o prijavi potraživanja (član 110. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj: 1321000256000080 – Vrsta prihoda: 722221 Budžet Tuzlanskog kantona.
- V Pozivaju se povjerioci da u roku od 30 dana, od dana objavljivanja oglasa o otvaranju stečajnog postupka u „Službenim novinama F BiH“, stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.
- VI Pozivaju se lica koja imaju obaveze prema stečajnom dužniku da ih bez odlaganja izvrše.
- VII Otvaranje stečajnog postupka ima se upisati u sudski registar Općinskog suda Tuzla, zkr. ured Općinskog suda u Gračanici, Službe za geodetske i imovinsko-pravne poslove Grada Gračanica.
- VIII Skupština povjerilaca (ispitno ročište) na kom će se ispitati prijavljena potraživanja zakazuje se za dan SRIJEDA 31.01.2024. godine u 13,00 sati, u zgradi Općinskog suda u Tuzli, ul. ZAVNOBIH-a bb, sudnica S4-prizemlje.

- IX Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka održat će se istog dana nakon ročišta za ispitivanje prijava potraživanja.

O b r a z l o ž e n j e

Dana 12.06.2023. godine, predlagač Intesa Sanpaolo banka BiH d.d. Sarajevo, podnio je prijedlog za otvaranje stečajnog postupka nad ovim privrednim društvom iz razloga platežne nesposobnosti, temeljem odredbe člana 4 i člana 6 Zakona o stečaju („Sl. novine F BiH“, br.53/2021).

Nakon razmatranja prijedloga sud je rješenjem od 18.08.2023. godine pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika temeljem odredbe člana 60, 61 i 63 Zakona o stečaju.

Privremeni stečajni upravnik u spis suda dostavio je izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Temeljem član 102 stav 1. Zakona o stečaju zakazana je ročište radi ispitivanja uslova za otvaranje stečajnog postupka i rasprave o izvještaju privremenog stečajnog upravnika.

Iz izvještaja privremenog stečajnog upravnika i navoda datih na ročištu proizilazi da je društvo obavljalo djelatnosti piljenja i blanjanja drveta (proizvodnja rezane građe) i impregnacije drveta, da se dana 13.09.2018. godine u proizvodnom pogonu društva dogodio požar u kojem je uništena ili teško oštećena proizvodna hala kao i većina proizvodnih mašina i opreme. Central osiguranje d.d. je isplatilo društvu određeni iznos na ime osiguranja, a od kojih sredstava je društvo rekonstruisalo proizvodnu halu što nije bilo dovoljno za pokretanje ponovnog poslovanja, s obzirom da je usljed požara nastupila šteta i na mašinama i opremi. Proizvodna hala i pogon, kao i sva oprema i mašine su opterećene hipotekom/zalogom u korist IntesaSanPaolo Bank d.d. BiH. Usljed neobavljanja djelatnosti društvo nije bilo u mogućnosti ispunjavati kreditne obaveze prema IntesaSanPaolo Bank d.d. BiH (koja je kao povjerilac i podnijela prijedlog za otvaranje stečaja), temeljem čega je banka jednostrano raskinula ugovor o kreditu i blokirala račun dužnika. Pred sudovima su u toku sudski postupci u kojima je dužnik tuženi i to po tužbama Bratex d.o.o. Tešanj i TINUPI TRANSPORTI d.o.o. Vuhred, Slovenija, odnosno izvršenik po prijedlogu za izvršenje Nery d.o.o. Maglaj. Iz knjigovodstvenog stanja proizilazi da društvo ima dugoročne obaveze (po osnovu dugoročnog kredita) u iznosu od 540.684,00 KM, kratkoročne obaveze u iznosu od 763.147,00 KM (obaveze prema dobavljačima, po osnovu kredita, ostale finansijske obaveze i ostale obaveze uključujući razgraničenja), kao i obaveze po osnovu javnih prihoda, s tim da bi se stvarni iznos obaveza mogao utvrditi tek po otvaranju stečajnog postupka i prijava potraživanja od strane povjerilaca. Društvo ima imovinu, međutim skoro sva imovina je opterećena hipotekama/zalogom IntesaSanPaolo Bank d.d. BiH i to zemljišta sa građevinskim objektima, postrojenja i mašine (sve nekretnine i 90% mašina su pod zalogom banke a preostale mašine su u vrlo lošem stanju), dva viljuškara koja su takođe pod zalogom banke, te alate, pogonski i kancelarijski materijal male knjigovodstvene vrijednosti. Glavni račun u Intesa banci je blokiran od 30.08.2022. godine. Privremeni stečajni upravnik je u izvještaju dao mišljenje da nastavak poslovanja društva nije moguć, da postoji razlog za otvaranje stečajnog postupka zbog platežne nesposobnosti društva, a kako društvo ne raspolaže slobodnom imovinom koja bi pokrila troškove stečaja (jer je imovina opterećena hipotekama/zalogama), smatra da je potrebno

pozvati sva zainteresovana lica da predujme troškove vođenja stečajnog postupka u iznosu od 34.000,00 KM prema specifikaciji troškova koja je dostavljena uz izvještaj. Stečajni dužnik a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka.

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema imovine znatnije vrijednosti koja bi činila slobodnu stečajnu masu i iz koje bi se prvenstveno imali finansirati troškovi stečajnog postupka, a budući da je pretežan dio imovine opterećen hipotekama i zalagama u korist Intesa Sanpaolo banke BiH d.d. Sarajevo, sud je u smislu odredbe čl. 102 stav 7. Zakona o stečaju rješenjem od 03.11.2023. godine pozvao dužnika, povjerioce i sva zainteresovana lica da izvrši uplatu troškova finansiranja stečajnog postupka u visini od 20.468,50 KM iz kojih sredstava će biti finansirani troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, podnošenja finasijskih izvještaja nadležnim institucijama sve do postupka brisanja društva dužnika iz sudskog registra privrednih društava, procjena imovine odstrane ovlaštenih vještaka, objava oglasa za unovčenje imovine i drugo). Predlagač Intesa sanpaolo banka BiH d.d. Sarjevo je u prilogu podneska od 13.11.2023. godine dostavila dokaz da je u cijelosti postupila po rješenju od 03.11.2023. godine, odnosno uplatila iznos od 20.468,50 KM na ime predujma troškova otvaranja i vođenja stečajnog postupka.

Na osnovu izvedenih dokaza tokom postupka utvrđeno je da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog a iz uplaćenih sredstava na ime finansiranja troškova prethodnog postupka i troškova stečajnog postupka od strane Intesa Sanpaolo banka BiH d.d. Sarajevo, postoje sredstva za finansiranje troškova stečajnog postupka. Temeljem navedenog ispunjeni su uslovi za otvaranje stečajnog postupka nad imovinom dužnika.

Sud je temeljem odredbe člana 102. stav 4. a u vezi sa članom 6. Zakona o stečaju odlučio kao u izreci rješenja.

Odluku o imenovanju stečajnog upravnika, sud je donio temeljem odredbe člana 104. stav 2. tačka b. Zakona o stečaju, a nakon što je utvrdio da isti ispunjava uslove utvrđene odredbom člana 71. Zakona o stečaju.

Sud je odluku o određivanju ročišta za ispitivanje prijavljenih potraživanja i izvještajnog ročišta, donio temeljem člana 106 Zakona o stečaju.

Odluku o objavljivanju otvaranja stečajnog postupka, sud je donio temeljem člana 105. stav 1. Zakona o stečaju.

Temeljem odredbe člana 105. Zakona o stečaju, sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je temeljem odredbe člana 108 stav 1 tačka a Zakona o stečaju.

STEČAJNI SUDIJA

Vedran Milašinović

POUKA O PRAVNOM LIJEKU:

Protiv ovog rješenja žalbu može uložiti stečajni dužnik. Žalba se podnosi Kantonalnom sudu u Tuzli, putem ovog suda u tri primjerka u roku od 8 dana po proteku 2 radna dana od dana objave rješenja u Sl. novinama FBiH. Žalba iz prethodnog stava ne odlaže izvršenje rješenja.